



INTRODUCZIUN

DAD URSICIN G. G. DERUNGS-BARTOLOMEI

Igl entir capetel 6 digl evangeli de Gion che vegn legius quellas dumengias ei dedicaus al tema dil «paun». All'entschatta plaida quei capetel della multiplicaziun dil paun e digl entusiassem della fuola ch'emproma suenter la miracla da contonscher Jesus ed ils ses ch'ei i a l'otra riva. L'«emprema riva» fuss simbolicamein quella dil paun che saziessa e fa tuts cuntents. L'«altra riva» ei quella dil «paun» sco enzenna. Enzenna de zatgei pli grond. Che provochescha la cardientscha.

Il text de questa dumengia tschenta in fundament essenzial en quei discuors: Il ver paun, il paun della veta ei Jesus sez. En scadin cass. «Jeu sun il paun dalla veta», di Jesus. Quei paun vegn daus giu da tschiel, sco la manna al pievel gediu el desiert. Sin quei scalem setracta ei buc d'in discuors eucaristic. Mo era cu ei setracta d'in tal discuors, stat buca l'eucaristia sco tala el center, mobein che Jesus, siu viver e murir, ei il paun ch'il cartent drova el desiert dil mund e della veta. Sa sch'ils auditurs han capiu quei, vul dir ch'els ston «assimilar» Jesus en lur veta – forsa pli fetg: vegnir «assimilai» dad el? Sa sche nus capin quei? Ed empruein da cuntonscher l'«altra riva»?

EVANGELI

Gn 6,24–35

²⁴Cura che la gliעד ha viu che ni Jesus ni ses giuvnals fuvan leu, ein els sez i ellas barcas, ein navigai a Cafarnaum ed han encuret g Jesus. ²⁵Els han anflau el sin l'otra riva dalla mar ed han dumandau el: Rabbi, cu eis ti vegnius neu cheu? ²⁶Jesus ha dau per risposta: Pilver, pilver, jeu ditgel a vus: Vus encuris mei buca per quei che vus veis viu enzennas, mobein per quei che vus veis magliau dils pauns ed essas vegni saziai. ²⁷Buca sestentei per la spisa che va en mal, mobein per la spisa che resta per la veta perpetna, la spisa ch'il Fegl dil carstgaun vegn a dar a vus. Pertgei quel ha Dieus il Bab confirmau cun siu sigil. ²⁸Cheu han ei dumandau el: Tgei stuein nus far per ademplir las ovras da Diu? ²⁹Jesus ha rispundiu: Vus fageis l'ovra da Diu, sche vus carteis en quel ch'el ha tarmess. ³⁰Els han rispundiu: Tgei enzenna fas ti pia, che nus veseien e saveien crer a ti? Tgei prestas ti? ³¹Nos perdavons han magliau il manna el desiert, sco quei ch'ei stat scret: Paun giu da tschiel ha el dau da magliar ad els.

³²Jesus ha detg ad els: Pilver, pilver, jeu ditgel a vus: Buca Moses ha dau a vus il paun giu da tschiel, mobein miu Bab dat a vus il ver paun giu da tschiel. ³³Pertgei il paun da Diu ei quel che vegn giu da tschiel per dar veta al mund. ³⁴Cheu han ei detg ad el: Segner, dai a nus adina quei paun! ³⁵Jesus ha rispundiu: Jeu sun il paun dalla veta. Tgi che vegn tier mei, vegn buc a ver fom pli, e tgi che crei en mei, vegn mai a ver seit pli.